

欽定大清會典事例

欽定大清會典事例卷六百五十三

兵部

馬政

貢馬二

撥馬

咸豐三年

諭德勒克多爾濟等奏。哲布尊丹巴呼圖克圖庫倫之  
署堪布諾們罕伊拉固克散。率領呼圖克圖喇嘛等。  
呈捐馬一千匹。求為轉奏。請旨一摺。該呼圖克圖等。  
聞南省賊匪滋事。捐馬一千匹。實屬出於誠悃。朕心  
甚為嘉悅。惟軍營應需馬匹。現已盈餘。足敷需用。况  
道路遙遠。到彼必至疲乏。且現據琦善等奏稱。已將

逆匪擒斬數千名。大兵一到。蠢茲小醜。必可立即撲滅。該呼圖克圖等所捐馬匹。著毋庸豫備。○又

諭德勒克多爾濟等奏。喀爾喀圖謝圖汗車臣汗兩部落汗王貝勒貝子公札薩克台吉等。呈請願捐馬二千匹。懇求轉奏。請旨一摺。圖謝圖汗車臣汗等。聞南省逆匪滋事。公同呈捐馬二千匹。實屬出於誠悃。殊堪嘉尚。惟軍營需用馬匹。現已敷用。著德勒克多爾濟等。轉行曉諭。伊等所捐馬匹。停止豫備。以示朕體恤蒙古臣僕之至意。○又

諭理藩院奏。錫林果勒盟長蘇尼特札薩克郡王齊旺

札布等。於本處應用馬匹。現在一律備齊等語。此項馬三千匹。為數不少。若賞收則於該蒙古等不無浩費。著理藩院轉飭札薩克王貝勒貝子公台吉等。所備交馬三千匹。著即停止。以示朕體恤藩臣之至意。

○又

諭。錫林郭勒盟長齊旺札布等。前次呈進馬三千匹。現已調來。著那敷德擇水草茂盛之處牧放。俾皆臙壯。可期得力。俟調用時。官兵馬匹。均可由十八盤一路進口。仍應先期知照。經過地方。一體照例豫備。○四年

諭札拉芬泰奏喀爾喀二部落蒙古呼圖克圖等。因軍務未竣。捐備駝馬。呈請轉奏。請旨一摺。札薩克圖汗三音諾顏二部落汗王公札薩克台吉等。及車臣汗部落頭等台吉車林多爾濟二部落之呼圖克圖等。情願各捐駝馬。忠悃出於至誠。深堪嘉尚。惟該蒙古人等。此項牲畜。藉資生計。且本年雨雪較多。道路泥滑。軍營需用駝隻。不甚得力。張家口距該部落又復遙遠。若盡行賞收。朕心實為不忍。著札拉芬泰等轉諭該蒙古呼圖克圖等。所捐駝隻。毋庸賞收。惟所捐馬四百匹。即著賞收。○又

諭札拉芬泰奏喀爾喀札薩克圖汗三音諾顏二部落  
汗王貝勒貝子公札薩克台吉等。及所屬部落札薩  
克郡王桑噶錫哩等。現因逆匪尚未勦除淨盡。情願  
捐馬二千一百餘匹。以備調用。呈請代奏。請旨一摺。  
喀爾喀札薩克圖汗三音諾顏二部落汗王貝勒貝  
子公札薩克台吉等。情願捐馬二千一百餘匹。以備  
軍營需用。洵屬忠悃出於至誠。實堪嘉獎。惟該汗王  
等。悉賴此項牲畜度日。且各處逆匪業經官兵疊次  
獲勝。殲斃多名。著札拉芬泰等。將此轉諭該部落王  
等。其所捐馬匹。均著毋庸賞收。以示朕嘉獎蒙古體

恤世僕之至意。○五年

諭火器營奏台吉捐輸馬匹等語。錫林果爾盟阿巴噶  
札薩克頭等台吉杜噶爾布木所捐馬一千二百匹。  
著賞收。並著於明年五月後將馬匹送交察哈爾都  
統查收。俟收齊後再行奏請獎勵。○七年奉

旨。惠親王等奏。蒙古王貝勒台吉喇嘛等呈請捐輸馬  
匹。代奏請旨一摺。蒙古王貝勒台吉喇嘛等因軍營  
需用馬匹。情願共捐馬六千七百匹。洵屬出於至誠。  
深堪嘉尚。著即賞收。此項馬匹著察哈爾都統於七  
八月間照數驗收。咨報該部後。再由理藩院奏請獎

勸。○光緒六年奏准。甘肅州各屬番族。每年應納貢馬。按現在丁口數目。照依原設壯丁二十名貢馬一匹之例。按數裁減。涼州鎮所屬番民。每年准其交納一匹。嗣後或有折價呈繳者。應照定章每匹止收銀八兩。以示體恤。

撥馬。○順治初年定。各省營馬缺額。開數報部。於各羣撥給。○康熙十八年覆准。給發各省營伍馬匹。驗閱肥瘦。發往兩廣福建等省者。在途餵養四次或三次。發往浙江者。餵養二次或一次。○三十七年



諭前據西甯茶馬五千匹。自邊外驅送三千至京。此地需馬不甚緊要。送二千足矣。聞得南省駐防軍士馬匹甚艱。其餘三千。送至荊州江甯杭州三處各一千。散給軍士。○三十九年

諭察哈爾所交牧廠之馬。撥八百匹。賜給翁牛特多羅杜楞郡王班第旗分。伊等馬匹短少。分給牧廠。令其生息。此馬匹即著喇錫前往分給。○又覆准。嗣後陝西茶馬。應俟管理茶馬衙門。每年將招中茶馬盤獲私馬數目。撥給何處。請

旨遵行。至兵部有應發馬匹。山陝路途遙遠。仍就近

撥給直隸營驛扣價。○四十四年覆准解京解省茶馬輪責茶司廳員解送。○乾隆二十四年諭據吳進義奏。上年督臣購備馬四千匹。現在軍務將竣。似無急需。陝甘營馬抽調以來。應有缺額未補。請以二千匹。由邊路解赴榆林。二千匹由內地解送西安等語。所奏甚是。此項馬匹與其額外分營飼秣。孰若酌量分撥陝甘。以補缺額。或有需用。亦可就近調遣。二省原有馬乾。可以支給。何必留於直隸。致多糜費。○二十五年

諭舒赫德奏稱。由阿克蘇至伊犁臺站馬匹不足。請將

庫車所有之馬千餘匹。選擇備用等語。駐兵屯田。關係緊要。臺站馬匹。必須充足。今烏魯木齊所易哈薩克馬匹甚多。著即酌量調用。仍宜善為牧放。不可因哈薩克貿易馬匹。源源接濟。遂可任其倒斃。○又

諭。據楊應琚奏。巴里坤現存馬一千二三百匹。而甘肅各營馬匹。每年例應出廠。巴里坤一帶水草豐裕。請於安西等五處提鎮標營。摘撥三千匹。赴巴里坤牧放。即於此內撥出一千五百匹。解赴阿克蘇。其伊犁屯田需馬九百匹。竟由巴里坤解往烏魯木齊豫備。其餘俱存巴里坤備撥等語。所辦自屬可行。但不知

內地馬匹。是否足數調撥。若已經照數撥往。則缺額竟不必亟於籌補。甘肅綠旗額馬。視他省較多。原為邊防起見。今西陲平定。則各營馬匹。不過供應差操足矣。況巴里坤水草既佳。同一牧放。而於馬有益。且省飼秣之費。豈不甚便。又如各營額缺。有必須購補者。即於哈薩克馬內酌量抽撥。亦可不必於內地採買。致費周章。○又

諭。據鍾音奏陝省沿邊各站。額外增添馬一千八十匹。除已撤五百八十匹外。其尚存五百匹。仍照原價變價歸款等語。此項額外增添臺馬。從前雖經軍機大

臣議令裁撤。但目下陝甘二省馬價尚在昂貴之時。若照原價變賣。將來僅有需購買之處。轉不免周章。且現今烏魯木齊等屯田處所。亦皆需馬。是以甘省此項增添臺馬。及孳生馬匹。皆令其解赴巴里坤等處。設廠牧放。今陝省應撤臺馬。事同一例。亦莫若照甘省之例辦理。在陝省既免變賣之煩。而出口牧放屯田處所。可就近撥用。亦甚為有益。○二十八年

諭。永貴等奏稱。喀什噶爾購馬二百七十九匹。用銀二千七百六十三兩有奇。計每匹銀十兩以內等語。嗣後各回城有需馬之處。俱著奏請調撥。停其購買馬

匹。○又議准。商都達布遜諾爾達里岡愛太僕寺牧廠內有可用驕馬。存留廠內。徒令齒老。直隸各標營。每年所缺之馬。自一千二百至一千八百餘匹不等。應令將缺額馬匹。於季底查照實數。將牧廠挑出上等中等之馬。趕赴張家口外波羅採吉。交差弁領回。於過關時。豫行知照稅務衙門。照數驗放。免其納稅。即照直隸滿椿馬匹。除皮臟銀五錢。每匹支銷朋扣銀八兩五錢。交內務府廣儲司查收。○二十九年奏准。烏魯木齊本標中左二營。倒馬合例者。照奏定之例。

在烏魯木齊換獲哈薩克馬內撥補其額外倒馬亦在哈薩克馬內撥給每匹作價八兩價銀歸正項應用嗣後烏魯木齊鎮標缺馬照此辦理○三十二年奏准內地各標營倒缺應補馬匹與甘肅鄰近之陝西及遞相連接之山西河南山東直隸等省除直隸赴張家口牧廠領補外其陝西等省遇有缺額俱給價在各口購買嗣後伊犁換獲馬匹除新疆各該處敷用外俱解至烏魯木齊巴里坤哈密等處各營臺以次充補缺額再有贏餘儘數送往甘肅內地應用

如甘肅補額有餘。即由近及遠。遞次充補。山西河南山東等省缺額。各該省買馬。向係動用朋扣銀兩。今將伊犁馬匹撥補。則此項馬價。即行按馬扣留。存儲各該司庫撥用。如撥補綠營。尚有贏餘。其甘肅等省駐防馬匹缺額。亦一體相間頂補。三十三年奏准。伊犁楚呼楚牧廠。現換獲哈薩克馬七千餘匹。應將各回城及烏魯木齊等處需用馬數。由伊犁解補外。伊犁抵補屯田臺站。及各營汛部落所需馬匹。約計留備四千。即敷應用。餘者全數解送內地。此項馬匹。



應視每年所易數目。於春秋閒緩程送至烏魯木齊。遞解至巴里坤。在彼處擇有水草之地牧放。仍緩程解送內地。以補營汛臺站缺額。至楚呼楚牧廠所收哈薩克貢馬。亦留本處使用。餘者一體解送。○又議准。伊犁解送內地馬匹。俱係生馬。應毋庸支給料石。每匹准日支七斤重草一束。每馬百匹。派解送兵八名。每名日支口食銀六分。回時一體支給。○三十九年奏准。烏魯木齊每年屯田驛站使用。並滿兵倒馬撥補。約需馬三千餘匹。除將本處牧廠孳生足歲馬

撥用外。所有不敷。由伊犁塔爾巴哈台換獲馬  
內撥給。巴里坤每年滿兵倒馬撥補。約需馬一  
千餘匹。亦由伊犁塔爾巴哈台換獲馬內撥給。

○四十八年

諭據保成奏豫備葉爾羌差務。由喀什噶爾撥馬一百  
匹。交付阿揚阿等差官。趕令前往等語。回部邊境。距  
伊犁不甚寫遠。伊犁現有與哈薩克交易馬匹。葉爾  
羌喀什噶爾等處驛站卡座。如有所需。即由伊犁取  
用。於事甚為妥便。著傳諭伊勒圖。嗣後烏什葉爾羌  
喀什噶爾等處。如有需用馬匹。即按照各處所用數

目。由伊犁所換羨餘馬內揀擇酌量所用撥往具奏。並傳諭綽克托阿阿揚阿保成等一體遵照辦理。○又議准伊犁解送內地馬匹應令挑選骨大口輕臆壯者烙用印記。委員於春草生時緩程解至烏魯木齊再行委員接解至巴里坤由陝甘總督派員前往會同巴里坤鎮驗收將馬匹暫留在廠牧放。至下年春草生時再委弁兵繞避戈壁緩程解至肅州。豫派各營照數前往領取撥補。此內自伊犁至巴里坤計程三十六站沿途雖間有戈壁而繞道行走水草尚可無虞。且

距馬匹起解時不久。自不應豫定倒斃額數。其自巴里坤至肅州計程二十三站。內有草處所。不過數站。餘俱戈壁相連。如有倒斃。應令該解員。割取耳尾烙印。據實報驗明確。准令開除。仍不得過三成。儻有浮報。以及烙印不對。倒斃過多等弊。該督查明叅辦。仍令賠補。○又議准。嗣後每年甘省各營合例倒馬。該督先期統計數目。行知伊犁將軍。照數撥解。毋庸留廠候調。稽遲時日。致有倒斃。○四十九年奏准。塔爾巴哈台解送科布多備用馬匹。向係先約日期。解至

交界卡倫地方。由該處派出官兵趕解此處。每卡倫俱有兵三四十名。若每馬一千匹。分為四起。即可酌派照料解送。毋庸特派官兵。另行給予錢糧。五十二年覆准。商都達布遜諾爾達里岡愛太僕寺牧廠。現存堪用驕馬。比前較少。所有撥補直隸營馬缺額之處。暫行停止。俟牧廠馬匹蕃盛時。再行具奏辦理。○又奏准。陝甘內地各營。每年額補馬匹。現計伊犁撥送馬匹。尚有不敷。請將巴里坤牧廠內驕馬。除撥補哈密廳差馬。及巴里坤鎮屬各營。及屯田臺站留

用外。多餘馬匹。儘數撥送內地各營。再有不敷。另行籌補。嗣後巴里坤孳生三廠。每年所有驢馬。均照此辦理。○五十三年奏准。伊犁塔爾巴哈台地方。時氣寒冷。近三月始能凍化草生。嗣後應於六月間。由伊犁塔爾巴哈台。將馬匹趕解至烏魯木齊。稍為歇息。再解至巴里坤。交該鎮覓好水草牧放。過冬。次年內地調取之時。於六月間。再就近趕解。此項馬匹。在巴里坤牧放時。應照伊犁塔爾巴哈台之例。每百匹准報倒斃六匹。○嘉慶十年

諭。向來兵部每遇差務。間有調取巡捕營馬匹。協濟當差之時。今巡捕營僅存馬二千匹。嗣後自難調取。協濟著軍機大臣覈議具奏。欽此。遵

旨議奏。嗣後兵部差務。先儘馬館及八旗備差馬應用。再有不敷。仍可先期行文察哈爾都統。即於京營牧放之二千匹馬內調撥。不得再調五營差操馬匹。其巡捕五營現存之差操馬二千匹。務令該兵丁覈實拴養。毋許通融缺額。此內並酌仿該營兵額舊規。令漢軍馬兵拴養六百匹。民馬兵拴養一千四百匹。均擇其勤謹樸實當差

奮勉者。給予餽養。仍令該管將官。以時點查。期於營制無虧。而帑項亦胥歸實用。奉

諭。京營馬匹。存營者差操緊要。即牧放之馬。亦仍須豫備調撥。均應查點足數。著由兵部奏請。特派王大臣會同步軍統領衙門。先將存營差操馬二千匹。點明烙印。給交官兵等分別餽養。再將應交張家口牧放之二千匹。另行點驗烙印。一面行文察哈爾都統衙門。派員來京。給領牧放。毋任虛冒。嗣後存營之馬。均需豫備各本營差操之用。兵部遇有差務。毋得再行調取。○又覆准。嗣後巴里坤屯工耕作。俱於孳生騾



馬內撥給。其孳生兒馬。除酌留每騾馬十匹配兒馬一匹外。其餘兒馬儘數駟割。除撥補該處營缺軍臺。以及哈密備撥各項需用外。其餘駟馬俱解送內地。以補甘肅各營缺額。儻再有贏餘。分撥陝西各營領用。○十六年覆准。陝西省漢中鎮各營兵丁。應需二成馬一千一百餘匹。甘肅各廠現無孳生餘馬。可以分撥。甘州牧廠存馬一萬五千七百餘匹之多。加以涼州。肅州。西甯三處牧廠。及巴里坤牧廠之馬。堪以撥補。令該督於各牧廠馬匹。實力查察。將及歲駟割。

之馬。撥補漢中鎮二成馬匹外。再有多餘。即陸續撥補各營缺額。○道光元年

諭。昨經降旨。將八旗圈馬。可否裁撤之處。交八旗都統妥議具奏。茲據英和等會同奏請。移拴裁撤。又據托津等六人及文孚各具摺奏。請仍循舊制。向來交議事件。原期集思廣益。今伊等各抒所見。不隨同唯諾。朕深嘉悅。甚合特交會議之旨。朕將各摺詳加披閱。自復設圈馬以來。原係因時制宜。不可徒有其名。終無實濟。自應隨時變通。以歸簡易為是。著照英和等所議。將現設滿洲蒙古圈馬二千四百匹內酌撥一

千匹。分給前鋒營每翼馬一百匹。八旗護軍營每旗馬一百匹。酌撥一千匹交察哈爾永遠牧放。以備調遣。餘馬四百匹。令八旗滿洲分左右翼。每年四旗輪流圈養。其騎操備差交代賠補。以及蒙古圈馬房間改修出租各事宜。均著照所議辦理。

互見八旗官馬門

七

年

諭。彥德等奏請旨將塔爾巴哈台之什德哩牧廠添設備差馬一百匹。按照從前倒斃六釐數目。改為三分報銷等語。即照彥德所奏。著在什德哩牧廠添設馬一百匹。以備差役。此項新設馬匹。著即照從前軍臺

三分報銷之例辦理。○又

諭。彥德奏調濟牧廠卡倫事宜一摺。察哈爾額魯特等。自設立牧廠以來。歷年交烏魯木齊科布多軍營內地馬牛。均無貽誤。現因生齒漸繁。生計拮据。著照伊犁奏定章程。自道光八年起。孳生廠所取馬駒牛犢。另廠牧放。遇有差撥不敷。一體撥用。○九年

諭。德英阿等奏。請酌添北路軍臺牛馬一摺。著照所請。於額設牛馬外。札木臺添牛五隻。噶爾巴特臺添牛十隻。亮噶爾臺添牛十隻。圖巴喇特臺添馬十二匹。瑚斯圖托海臺添馬十匹。塔木哈塔什臺添馬八匹。

噶克察爾海臺添牛十隻。此項所添牛馬。准其由伊犁官廠內。照數撥給。互見馬幣門。○二十二年

諭。賽尚阿等奏。買補營馬三百十九匹。又天津縣買補馬七十匹。此項馬匹。著於南苑牧放之餘馬內。如數撥還各營。毋庸買補。○又

諭。訥爾經額奏。吉林黑龍江官兵。原領直隸營馬。擬請照數撥補一摺。山海關一帶。吉林黑龍江官兵。原領直隸營馬五百零三匹。該官兵現俱乘騎歸伍。又陸續撥補倒斃馬三十八匹。共五百四十一匹。著准其仍於南苑牧放馬內。一併請領分給各營。以資差操。

並著訥爾經額迅即派員來京領取。○又議准直隸省各營縣應撥還馬共九百三十匹。商都在苑牧放馬一千二百匹。除撥天津六百匹外。下存馬六百匹。又陸續倒斃馬一百六十一匹。太僕寺在苑牧放馬八百匹。除調撥天津四百匹。下存馬四百匹。又陸續倒斃馬一百十六匹。現在兩處實存馬七百二十三匹。計不敷馬二百零七匹。即於察哈爾領放直隸出青在苑牧放馬三千一百七十六匹內。提撥二百七匹。撥還直隸各營縣九百三十匹之額。交直隸委員收領。

毋庸再由察哈爾捐輸馬匹內撥補。○二十三年

諭嗣後如遇恭謁

陵寢阿哥圍差及別項用馬較多差務著上駟院兵部先期於察哈爾牧放馬匹內調取備用。

欽定大清會典事例卷六百五十四

兵部

馬政

馬罰

馬禁

馬罰○舊例各營官兵馬匹缺額赴部領解於沿途倒斃過多者罰俸一年○又題准營馬對敵及追盜賊損失者免其賠補走脫被竊失者著落本人賠補若倒斃者每馬以十兩為額令其賠補名曰賠椿每年遞減一兩至十年者免其賠椿准動支朋扣銀購買○康熙三年議准江南江西福建浙江湖北湖南四川廣東廣西



雲南貴州等省營馬以三年賠椿過三年者免  
直隸山東山西河南陝西甘肅以五年賠椿過  
五年者免。○四年題准三年賠椿之省一年倒  
斃本兵賠銀七兩合隊二兩本營官一兩二年  
倒斃本兵賠銀六兩五錢合隊一兩七錢本管  
官八錢三年倒斃本兵賠銀六兩合隊一兩四  
錢本管官六錢三年以後免其賠椿動支朋扣  
銀買補五年賠椿之省一年倒斃本兵賠銀七  
兩合隊二兩本管官一兩二年倒斃本兵賠銀  
六兩五錢合隊一兩七錢本管官八錢三年倒

斃本兵賠銀六兩。合隊一兩四錢。本管官六錢。  
四年倒斃本兵賠銀五兩五錢。合隊一兩。本管  
官五錢。五年倒斃本兵賠銀五兩。合隊七錢。本  
管官三錢。五年以後免其賠椿。動支朋扣銀買  
補。又題准廣東省地方潮涇馬易倒斃賠椿  
照十兩減半。一年倒斃賠銀五兩。二年倒斃賠  
銀四兩五錢。三年倒斃賠銀四兩。三年以後免  
其賠椿。五年題准廣西省地方瘴涇馬易倒  
斃賠椿照廣東之例。十一年題准領解馬匹  
如十分內倒斃三分以上者罰俸一年。六分以

上者降一級調用。八分以上者革職。如將馬匹私賣私給並缺馬仍支草料者革職提問。○四十二年奏准八旗官兵因公事令騎官馬須加意照看。不許倒斃遺失。但不立定章程辦理恐難盡一。嗣後領騎各該處先將官兵及佐領姓名並應領馬數造冊送部。由部照冊編立印單。註明給馬旗分。領馬時各該處出具印領交該管官赴部親投。由部查對相符給予印單。照數領騎。回京時領馬官兵將馬交還原給旗分。如有未交還者該旗將領馬官兵及佐領姓名開

明咨部。由部行文各該處限兩月交還。若馬有倒斃遺失逾兩月之限。尚未賠補。由部叅奏。將倒斃遺失馬匹之人。係官罰俸一年。兵鞭八十。不催追之都統等及該管各官。罰俸六月。領催鞭五十。仍著本人賠補。儻再逾兩月。仍不賠補。將倒斃遺失之人。係官降三級留任。完日開復。兵鞭一百。都統及該管各官。罰俸一年。領催鞭八十。仍著本人賠補。其因公事領用官駝者。亦照此例行。○又奏准八旗官兵因公事領騎官馬。給馬旗分。該佐領別作記號印烙。於回京交

還時。照原印烙記號驗收。若領騎之官兵欲將好馬留用。詐稱倒斃遺失。賠補後。其原印烙記號之馬。經本人認出。將領騎官兵照偷馬例治罪。○雍正三年奏准。八旗兵丁所養馬駝。如有疲瘦不堪用者。鞭五十。該佐領驍騎校罰俸三月。參領副參領罰俸一月。若並不餵養。冒領錢糧者。鞭一百。革退。冒領錢糧追繳。該佐領驍騎校罰俸一年。參領副參領罰俸六月。○七年覆准。山西河南陝西甘肅四省營馬開報倒斃不得過十分之三。○十一年議准。直隸山西河南

陝西甘肅馬價在十兩之內。山東亦僅十兩。均未便以十兩賠椿。應以七兩為額。如騎一年倒斃。賠椿七兩。二年倒斃。賠椿六兩。以下按年遞減。若騎過年限。免其賠椿。准動支朋扣銀買補。○又覆准。福建省營馬五千七百七十一匹。每年准開報倒斃九百三十五匹。○十二年覆准。廣東省營馬五千二百六十六匹。每年准開報倒斃九百二十一匹。○又奏准。福建廣東兩省營馬。開報倒斃。每年各有定數。山西河南陝西甘肅四省。每年不過十分之三。至直隸山東江

南江。西。浙。江。湖。北。湖。南。四。川。雲。南。貴。州。十。省。開  
報。倒。斃。數。無。一。定。嗣。後。均。不。得。過。十。分。之。三。額  
外。浮。開。者。減。去。不。准。開。銷。○。又。議。准。四。川。省。營  
馬。既。將。原。價。減。去。四。兩。照。驛。馬。給。以。八。兩。所。有  
賠。椿。銀。即。照。直。隸。等。省。之。例。以。七。兩。為。額。按。年  
遞。減。○。十。三。年。覆。准。八。旗。馬。駝。每。年。出。廠。牧。放  
其。佐。領。下。留。京。之。馬。原。備。緊。要。差。遣。必。待。本。部  
印。文。方。准。撥。用。若。官。員。以。私。事。乘。騎。馱。載。者。罰  
俸。九。月。○。乾。隆。三。年。覆。准。八。旗。官。兵。因。公。事。領  
騎。馬。駝。宜。令。大。員。監。看。查。禁。弊端。嗣。後。於。給。馬

駝時該旗副都統一人前往稽察。○六年奏准大小官員將自畜馬匹抑勒營伍收買多取價值若經營驛據實詳揭該督撫提鎮不題參者照徇庇例議處詳揭之營官以應升之官即用督撫提鎮失察者罰俸一年。○十六年

諭滇省各營騎操馬匹定例三年以外准報倒十分之三其額外溢倒之馬從前該督提等皆於朋扣等項內通融買補並未著賠嗣據該督查出奏聞仍請從寬免其賠椿經軍機大臣等議令照例按數賠補但念邊方水土餽養馬匹與他處情形不同自來通融



籌辦相沿已久。今若復令賠椿。兵丁未免拮据。嗣後滇省馬匹除額定十分倒三。按例分別年限著賠外。其溢額倒斃馬匹。著加恩免其賠補椿銀。仍照從前通融辦理。以示軫恤兵艱之意。若丁弁等因有此旨。或致餽養失宜。溢倒過多者。該督提等嚴行叅處。○二十三年奏准。隨圍官兵領騎官馬。如有倒斃者。賠銀四兩。遺失者。賠銀七兩。領用官駝。如有倒斃者。賠銀十六兩。遺失者。賠銀二十兩。至隨從

鑾駕謁

陵官兵。程途無幾。非大圍可比。領騎官馬。如有倒斃者。賠銀七兩。遺失者。賠補馬匹。○二十四年奏准。隨圍官兵。領騎官馬。遇有倒斃。俱係割有耳尾。具報。

行在兵部驗明。照例賠銀。其遺失馬匹。無憑查察。恐有不肖之徒。將好馬隱留。誑報。若照例賠銀七兩。轉不知畏懼。應限一月交納馬匹。限內不交者。官則指叅。兵則重責。仍勒令賠還馬匹。並將該管大臣官員等議處。○三十二年議准。各回城備差馬。每年十匹之內。准其報倒三匹。其牧

放備用官羣馬。仍令百匹之內。每年報倒六匹。如倒馬逾額者著賠。○又議准新疆各回城卡倫官兵。每兵騎馬一匹。每年通計十匹之內。准其報倒三匹。餘令賠交。○三十三年奏准。嗣後隨圍官兵領騎官馬。倒斃者俱令賠銀七兩。遺失者仍令購馬賠補。○三十四年覆准。廣東省營馬。每百匹。每年准倒十五匹。不許逾額。嗣後各營倒斃馬匹。務將耳尾交同駐之府州縣丞倅。驗明申報。然後准其領價買補。○三十五年覆准。廣西省營馬。每百匹。每年准倒一十七匹。

○三十六年

諭隨圍官兵領騎官馬內有倒斃者每馬賠銀七兩限兩月交部官員力量尚可兵丁每月所得錢糧有限未免拮据嗣後官員倒斃官馬仍限兩箇月賠交兵丁於應得錢糧內每月坐扣銀一兩著為例○又議准嗣後隨圍官兵領騎官馬必令小心騎秣愛惜乘騎交各該管大臣留心訓飭仍令提督衙門將更換好馬捏報倒斃等弊嚴行查察若實有倒斃者該管大臣據實查驗報部如有更換捏報一經查出將該管大臣官員照徇庇例議

處。本人從重治罪。仍著落分賠。此項追賠銀兩。仍照例每馬一匹。交銀七兩。不給限期。即行催交。回園後。兵部將各該處倒馬數目覈對。報倒多者。將該管大臣官員等。交部察議。○三十九年。奏准烏魯木齊等處。屯種馬羸驢。每十匹。准倒三匹。牛。每百隻。准倒十五隻。餘有倒斃。責令賠補。○五十一年。奏定。軍營滿漢官兵騎馬。以五分。准銷。五分。著賠。馱羸馱馬駝隻。均以八分。准銷。二分。著賠。若口外地方。實係水土惡劣。山路陡險。馬羸駝隻。易致受傷倒斃者。臨時該督

撫按實在情形。及打仗久暫。程站遠近。作何銷  
賠之處。確覈奏明辦理。○嘉慶十二年。奏准官  
兵領騎圍馬。如有倒斃。將馬耳鬃尾烙印呈驗。  
賠銀七兩。若呈驗不對。捏報倒斃者。該管官照  
例議處。本人治罪。銀兩加倍著落分賠。其遺失  
及殘疾者。均責令賠補好馬歸圈。如無好馬。遺  
失者加倍賠銀。殘疾者送驗之後。賠銀七兩。於  
回圈時。即著落各旗營該管大臣責令如數呈  
繳由

欽派大臣點收。如不能呈繳者。即著落各旗營該管

大臣墊出。將該官弁交部議處。兵丁責懲。仍嚴  
追應賠銀兩。其短缺馬匹。先將調用察哈爾牧  
廠馬匹內。照數扣留存圈足額。繳賠之價。按每  
匹七兩。由

欽派大臣。點交察哈爾官兵。帶回購買。補足牧羣之  
數。又奏准交察哈爾出青馬匹。逾額倒斃者。  
令賠五歲以上肥壯之馬歸圈。又奏定購買  
營馬。不許短價侵漁。如本官有剋扣攤派等弊。  
該將軍總督巡撫提督題叅。將本官革職。計贓  
治罪。若任聽兵丁以不堪營馬充數者。該管官

降三級調用。○又奏定巡捕五營及直省各營副將以下官員兵丁應扣朋銀並賠椿銀兩原備各營買馬之用。如官兵不扣朋銀者該管官罰俸一年。提督罰俸六月。如無提督省分總兵罰俸六月。○又奏定官員將豫備軍需馬駝牧養不善以致疲瘦者降三級調用。○又奏定奉派出師官兵應需馬匹在於各鎮營內挑選。如將不堪備用之馬濫挑充數將承辦挑選之員降三級調用。未經飭駁更換之該管上司降一級調用。提督總兵降一級留任。如係提督總兵



自行挑選。即將提督總兵降三級調用。○又奏定直隸省領餵旗馬三千一百八十八匹。每年於秋閒歸營餵養。至次年立夏時交察哈爾牧放出青時。由提督驗明臚分。分列等第造冊。由總督察覈送部。如列為三等者。罰俸一年。如有餵養不善。以致馬匹疲瘦不堪乘騎者。即據實參奏。將經營之員降一級留任。馬匹仍著落賠補。○又奏定甘肅省提標西甯鎮各處牧廠所牧馬匹。不論兒騾馬。每三匹取孳生馬一匹。如應取駒千匹者。以百匹為一分。十匹為一釐。應

取駒百匹者。以十匹為一分。一匹為一釐。三年  
內。若於額取之內。少孳生二分以下者。罰馬四  
釐。牧長。牧副。牧兵。各責二十棍。少孳生四分以  
下者。罰馬八釐。牧長。牧副。牧兵。各責三十棍。少  
孳生六分以下者。罰馬一分二釐。牧長。牧副。牧  
兵。各責四十棍。少孳生八分以下者。罰馬一分  
六釐。牧長。牧副。牧兵。各責五十棍。少孳生十分  
以下者。罰馬二分。牧長。牧副。牧兵。各責六十棍。  
如於原牧數內。缺少者。牧長。斥革。牧副。革退。牧  
兵。網責八十棍。除照頭等。罰分賠外。所缺原牧

馬匹仍著落牧長賠補二成。提督總兵遊擊分賠八成。賠交馬匹仍歸原羣扣限取孳。其二羣得賞三羣得罰之遊擊降一級留任。提督總兵罰俸六月。一羣得賞四羣得罰之遊擊降一級調用。提督總兵罰俸一年。五羣全罰之遊擊革職。提督總兵降一級調用。如於原牧數內缺少者。除將千總把總罰出馬數補入外。其餘著落遊擊提督總兵各半分賠。至官兵未滿三年者。毋庸議罰。○又奏定。巴里坤東廠西廠三廠牧放馬匹。不論兒騾馬。每三匹取孳生馬一匹。如

應取駒千匹者。以百匹為一分。十匹為一釐。應  
取駒百匹者。以十匹為一分。一匹為一釐。三年  
內。若於額取之內。少孳生二分以下者。罰馬四  
釐。牧長。牧副。牧兵。各責二十棍。少孳生四分以  
下者。罰馬八釐。牧長。牧副。牧兵。各責三十棍。少  
孳生六分以下者。罰馬一分二釐。牧長。牧副。牧  
兵。各責四十棍。少孳生八分以下者。罰馬一分  
六釐。牧長。牧副。牧兵。各責五十棍。少孳生十分  
以下者。罰馬二分。牧長。牧副。牧兵。各責六十棍。  
如於原牧數內缺少者。牧長。斥革。牧副。革退。牧

兵細責八十棍。除照頭等罰分賠外。所缺原牧馬匹。仍著落牧長賠補二成。提督總兵遊擊分賠八成。賠交馬匹。仍歸原羣扣限取孳。其二羣得賞三羣得罰之遊擊都司守備降一級留任。一羣得賞四羣得罰之遊擊都司守備降一級調用。五羣全罰之遊擊都司守備革職。其巴里坤鎮統轄東廠西廠三廠如九羣十羣得罰者。罰俸半年。十一羣十二羣十三羣得罰者。罰俸一年。十四羣十五羣得罰者。降一級調用。如於原牧數內缺少者。除將千總把總罰出馬數補

入外。其餘著落遊擊都司守備總兵各半分賠。至官兵未滿三年者。毋庸議罰。○道光二十一年。奏定營馬倒斃。該營員並不照例分別年限追賠椿銀。官為買補。概令兵丁自買者。照不應重律降二級留任。○二十三年。奏定營馬餵養不善。以致臆分不足。馳驟無力。經閱伍大臣參奏者。將該管官降一級留任。○咸豐六年。

諭。侍順奏查驗大凌河官馬虧短。請將牧放不善之牧長等懲處勒賠一摺。錦州大凌河牧羣額設馬匹。據該副都統查出倒斃虧短甚多。牧長永泰興德倭什

肯均著先行摘去頂戴勒限三箇月責令該員等率同副牧長牧副委牧副及牧丁等設法賠補儻限滿不完即行嚴參懲辦並副牧長等一併治罪牧羣翼領豁宗阿鳳圖均係專司之員漫不經心亦難辭咎著先行交部議處○八年議准嗣後烏魯木齊馬匹倒斃均應實報不得援照例文概以二分覈銷至該處各營馬匹向係八兩買補今奏明酌減二兩以六兩買補○同治元年奏准馬匹解赴軍營或數百里或數千里跋涉艱辛更須加意餵養向來調馬時先期知照經過地方官廣設

棚房寬儲草料。嗣後沿途馬乾照例酌減十分之二應付。如有剋扣者。從重治罪。如解馬官額外需索。亦照此辦理。○又奏准例載武職官員解送軍營馬匹。每一百准其倒斃三匹。如倒斃四五匹至二十匹者。按數分別議處。二十匹以上者。分別治罪。如有盜賣別情。交刑部從重治罪。其總理督解之員。合其督解總數。按其倒斃多寡。亦照此分別議處治罪等語。現在沿途馬乾業已酌加。自不得以例價不敷餽養藉口。如有例外報倒者。照數追賠。其數多者。均照例分



別治罪

馬禁。○順治五年定。現任文武官及兵丁。准其養馬。其餘人等。不許養馬。○七年議准。蒙古馬來京。不許商販私買。違者治罪。○十二年議准。蒙古馬來京。如有商販私買者。旗人責成該管官。民人責成五城司坊官。嚴行查緝。○又議准。蒙古進貢馬駝之外。有多帶願於途間賣者。聽若有通曉蒙古語言之人。前往邊界。與蒙古交結。並遠相迎接。買其馬駝者。交刑部治罪。所買馬駝入官。守口官私放此等人出口者。革職。至

蒙古到館之後未進貢之先有入館私買貢馬  
貢駝者。係官降一級罰俸一年。常人鞭一百。如  
有搶奪偷盜者。無論官民皆交刑部治罪。○十  
五年題准文武官武進士武舉兵丁捕役等。准  
養馬以備乘騎。均令印烙。○十六年題准民人  
聽其養馬。毋庸查禁。○康熙元年題准除滿洲  
蒙古漢軍及漢文武官武進士武舉兵丁捕役  
外。其民人違禁養馬者。仍照例治罪。○三年題  
准民人違禁養馬者。責四十板。失察之該管官  
罰俸一年。○又議准違例販買馬匹。被人出首

者馬給出首之人。價銀入官。家僕出首者。准其開戶。交該都統於本佐領內酌量調撥。不論馬販馬牙俱處絞。其主係官罰銀一百兩。係平民。枷號一月。鞭一百。該管官不行嚴查。佐領罰銀五十兩。驍騎校罰銀三十兩。撥什庫鞭八十。

又

諭京城兩翼馬市。如有販馬之人。許將馬數呈明佐領。令撥什庫至收稅處報明。許其貿易。若在京城外。及直省販賣者。照前治罪。○五年題准。直省民人違禁販馬。或私作馬牙。被人出首者。價銀給出首之

人馬匹入官。其失察之州縣官。罰俸一年。典史吏目驛丞等官。罰俸六月。知府同知道員亦罰俸六月。督撫罰俸三月。○七年議准旗人在外省販賣馬匹者。販子處絞。牙子係旗人。枷號兩月。鞭一百。係民人。責四十板。流三千里。○又題准在京民人違禁養馬。被人出首者。首人係旗人。即以所獲之馬給賞。係民人。刑部動支庫銀五兩給賞。馬匹入官。直省民人違禁養馬。被人拏首者。該地方官動支存庫贖罰銀五兩給賞。馬入官充驛遞用。○十年題准民人仍准養馬。

毋庸查禁。○十一年定。駐防官來京買馬回省者。該將軍都統開寫馬數印文咨部。給予照驗。又駐防官不呈明該將軍都統報部。私差家人來京買馬者。罰俸一年。○十二年題准。民人養馬。仍行禁止。○又議准。在京旗人私往外省販馬。係正戶將該佐領驍騎校。罰俸一年。領催鞭五十。係僕人伊主有官者。罰俸一年。常人鞭一百。該管佐領等免議。於馬販名下追銀十兩。給拏首之人。仍交部治罪。○十五年題准。大小官弁。將自畜馬匹。勒令營伍收買。多取價值者。照

貪官例革職提問。又題准督撫提鎮差遣官役買馬者。若於部發號票外多買及挾帶馬販私買者。許經過地方官嚴行查拏。若被旁人拏首。或別處查獲者。經過地方官俱降一級留任。官役從重治罪。差遣之督撫提鎮俱罰俸一年。○十六年議准姦匪圖利。將馬在賊境接壤販賣與賊者。不論官兵民人。各照例治罪。該管官兵知情故縱者。以同謀論。失察者。文職州縣官。武職專汛官。皆革職提問。道府及兼轄官。皆降五級調用。該管總兵官。降三級調用。督撫提鎮。

降三級留任。若販馬之人由本汛拏獲文武各官皆免罪。將拏獲之官議敘。十名以上者紀錄一次。多者照數紀錄。五十名以上者加一級。百名以上者加二級。其不係本汛有能盤獲十名以下者紀錄一次。十名以上者加一級。二十名以上者加二級。三十名以上者加三級。四十名以上者加四級。五十名以上者不論俸滿即升。百名以上者越升一級。即用拏獲販馬之人將所獲之馬盡行賞給。○十八年定。凡往各省販馬者。令於該旗呈明地方。並馬數印文咨兵部。

給印票經過地方官驗票放行。若擾害百姓者。將伊主一併嚴加治罪。○又議准凡進喀爾喀額魯特館內買馬販賣者。係旗人。枷號一月。鞭一百。係民人。責四十板。徒二年。○十九年題准。凡不領印票販馬者。係旗人。枷號兩月。鞭一百。係民人。責四十板。流三千里。馬入官。○二十五年覆准。販買馬匹。原因用兵起見。今各處俱已平定。撤兵。嗣後馬販往各省販馬。永行禁止。○二十九年題准。民人養馬。毋庸查禁。○三十一年奉



旨一應馬匹。永行禁止宰殺貨賣。交與步軍統領及五城司坊官查拏。○又議准偷盜八旗官兵馬者。分別匹數治罪。其牧馬之人自行偷賣者。亦照偷馬賊治罪。至屯莊居住旗人賣馬者。令上稅准賣。民人既准養馬。彼此買賣。皆所不禁。或驛站買用。或兵民買用。今報明本處地方官上稅。准其買賣。不上稅者。照例處置。○又覆准八旗官兵屯莊牧養之馬被偷。失主即時報該營汛官弁。帶領兵丁追緝。到交界地方。交與鄰近營汛官弁接遞追緝。獲賊官每案紀錄一次。兵於賊名

下每匹追銀一兩給賞。若失主呈報該營汛官弁不即領兵追緝鄰境不即接遞追緝者官每案降一級罰俸一年。兵責二十棍。○又覆准向來各省買馬均先在部領票經過地方文武官驗票放行。如有姦匪將私馬附入票內影射行走難於稽察嗣後各省將軍督撫提鎮等若須買馬令豫先報部本部暫停給票聽其往各口及京城照數購買買到之日由部印烙然後給票。票內註明馬數並所往該省路徑令經過地方文武官將票內馬數及本部印烙驗明放行。

若無本部印烙。及馬比票內數多者。查拏治罪。如經過文武官不行查拏。文官交吏部議處。經過地方之專汛官。罰俸一年。○又議准。京城內外旗民收獲逸失馬駝者。不許隱匿變賣。即日呈報該管官送部。由部交館所監督餵養。仍移咨八旗並牌行五城有認領者。開明逸失日月及毛色口齒。係旗人取具佐領印結。係民人取具地方官印結。由部查對毛色口齒相符。准其認領。如過一月無人認領。交館所監督變價。解交戶部。○三十九年覆准。偷盜之馬。經過地方。

該官弁無從知係偷盜之馬。所有職名免其查  
叅。該官弁能拏獲偷馬賊者。每案紀錄一次。拏  
獲之人。每匹向賊追銀一兩給賞。○雍正八年  
議准。騾馬聽民人畜養。毋庸查禁。驢馬為營驛  
之所必需。除八旗人等。及漢文武現任候選候  
補官。文武進士舉人生員武童。准其畜養外。其  
餘民人。一例查禁。現在畜養之驢馬。各令變賣。  
近京二百里以內者。由戶部照時價收賣。撥與  
八旗畜養。二百里以外。及各省地方。由州縣官  
照時價收賣。以補營驛缺額。均不許假查禁之

名留難扣剋以致擾累民人。○九年

諭前據旗臣奏請禁止民間畜養驢馬。比時發與大學士九卿會議准行。頃聞不許畜養驢馬。民間有不便之處。著不必禁止。仍照舊畜養。該部即通行曉諭。並行文各省知之。○十年題准八旗馬駝有私賣與人者。係官革職。係兵鞭一百。革退。該管官不能查出。罰俸六月。該管都統等。罰俸三月。○乾隆十一年議准。令各督撫提鎮轉飭關津隘口。除官員紳士騎馱馬匹及民間騾馬不禁外。凡無職人等。帶有驢馬二三匹以上者。務須盤詰根由。

僮係私販即行治罪。如員弁兵差有不實力稽察。及受賄陰縱。或乘賤坐買者。一併查叅治罪。其直隸山西去口甚近。如有私販一體治罪。○

十二年奏准

盛京地方嚴禁朝鮮收買大馬。原有深意。今朝鮮國人來京。往往私買大馬帶回。應令左右兩翼嚴禁。不許朝鮮購買。並令山海關等口嚴行查拏。若通事人等圖利代為購買。查出一併治罪。○十三年覆准各省營驛民人有赴川黔販馬及川黔之人販馬至各省售賣者。令各省督撫

提鎮等轉飭屬員嚴查私販按律治罪。○十四年奏准京城八旗所需馬全在兩翼購買關口官弁遇商販人等持有兩翼印票者立即放行毋得禁阻。○二十四年

諭蒙古地方並無房屋牆垣且蒙古人等俱賴四項牲畜度日故凡犯偷盜牲畜者定罪比內地竊盜為重但現行蒙古律例若所竊牲畜少者擬絞監禁數年後減等發放所定律內並未分別輕重此等人俱係慣行偷竊之徒若減等放出仍在蒙古地方居住勢必仍行偷盜牲畜於有業蒙古人等殊無裨益嗣後

此等偷盜賊犯內。若所竊牲畜數多。情屬可惡者。著即入於情實。如所竊牲畜數少。情非可惡者。仍視其所竊之多寡。比較遠近。分別發遣內地。於蒙古地方既可肅清。而盜賊亦知所做戒。其應如何更定之處。著定議具奏。欽此。遵

旨議定。嗣後蒙古等除搶奪四項牲畜殺人及傷人者。仍照舊例辦理外。如偷竊四項牲畜。滿十匹以上者。將首犯擬絞監候。秋審時入於情實。六匹至九匹者。首犯即發雲貴兩廣煙瘴地方。三匹至五匹者。發湖廣福建江西浙江江南等處。一



二匹者。發山東河南等處俱交驛地充當苦差。其民人在蒙古地方偷竊九匹以下者俱照此例一體分別充軍。○又奏准嗣後

行圍巡幸地方。如有偷竊馬匹者不分蒙古民人五匹以上擬絞立決以示懲儆。三四匹一二匹者分別定地發遣。○三十二年議准太僕寺左右兩翼牧廠馬匹。各該處沿邊地方。僅有私買私賣者。或經查出或被首告。將私買私賣之人治罪。其馬歸入本廠。仍追價銀。將一半入官。一半賞給首告之人。失察該管官。交部議處。○五十

年議准。偷竊蒙古四項牲畜三十匹以上者。不分首從擬絞監候。秋審時俱擬入情實。其為從未經同行。僅於竊後分贓者。減發雲貴兩廣煙瘴地方二十匹至三十匹者。首從俱擬絞監候。秋審時將為首者入於情實。為從同竊分贓者入於緩決。其未經同行。僅於竊後分贓者。減發湖廣福建等處十匹至二十匹者。為首擬絞監候。秋審時入於情實。為從同竊分贓者。發雲貴兩廣煙瘴地方。其未經同行。僅於竊後分贓者。減發山東河南等處六匹至九匹者。為首發雲

貴兩廣煙瘴地方為從同竊分贓者發湖廣福建江西浙江江南等處其未經同行僅於竊後分贓者鞭一百三匹至五匹者為首發湖廣福建江西浙江江南等處為從同竊分贓者發山東河南等處其未經同行僅於竊後分贓者鞭一百一二匹者為首發山東河南等處為從同竊分贓者鞭一百其未經同行僅於竊後分贓者鞭九十每羊四隻作牛馬駝一隻計算竊羊不及四隻者為首鞭一百為從同竊分贓者鞭九十其未經同行僅於竊後分贓者鞭八十。

嘉慶四年

諭。向來扈從官兵。分領馬匹。及馱載官物駝隻。回京後。竟有不交馬駝。以錢文銀兩折交者。派出之王大臣。亦視為泛常。准其折交。積弊相沿。朕所素悉。各牧廠官馬官駝。均有定額。若每次扈從回京。輒行折交。則官馬官駝。日漸減耗。民間駝馬。日漸增多。於事殊有關係。且恐馬販等。串通領馬之人。私行售賣。轉販他省。現在教匪滋事。多有馬匹乘騎。推原其故。未必不由於此。嗣後監視收馬王大臣。自當認真稽察。並著兵部嚴行查禁。如有折交者。即行嚴拏。指名奏聞懲

究其收馬之胥役等。亦不得因禁止折收。有意留難。別滋弊竇。○又奏准私販馬匹一項。皆由各口出入。因之轉販他省。漸次散售。而各省營驛駐防。希圖賤買商販之馬。濫行充數。而各口惟以收稅為務。於私販一事。因無責成。並不留心查察。嗣後各省差員赴口購買馬匹。均由兵部先行知會各口。俟買馬進口。覈對馬數相符。始准放入。其直隸山西二省。距口較近。仍聽該省督撫出具印票。遣員採買。其馬匹數目。應令豫行報部。即知照各口。一律覈對放入。庶不致有私販夾

帶情弊。並責成各守口官員。遇有私販經過。即行盤獲。將馬入官。私販人等。送刑部治罪。儻各口暨沿途經過地方。並不留心查察。任其偷越。將守口及經過地方文武員弁一體叅處。○十一年

諭我朝

家法。凡遇講武行圍。及一切時巡典禮。扈從大臣官員兵丁等。均須馬力馳驅。定制分別給予官馬。俾資乘騎。大臣等祿入較優。故官給之馬。為數較少。至官員兵丁等。則視其差使之繁簡。定馬數之多寡。少者一

二匹多者三四匹。至虎槍處官兵因其登陟山險。馬力易疲。一人多至五匹。實為體恤官兵起見。迨差竣旋京。仍將原馬交官。如有倒斃者。將馬耳馬尾呈驗。仍令按價折交。此項馬匹交齊後。仍飭所司加意牧養。俟需用時再行派撥。其收馬放馬時均特派王大臣前往督察。立法至為詳盡。歷久遵行勿替。乃不知始自何年。官兵等竟有將官給紅單私行售賣之弊。後遂相率效尤。視為常事。王大臣明知此弊。並不參辦。以致日久弊深。牢不可破。實屬非是。大有害於馬政。每遇行營。該官兵等或數人合雇一僕役。馱載無

多。自揣差使可以無誤。輒將餘馬任意變賣。賺錢花用。回京時將馬價折交。而察哈爾官兵以應交之馬多有贏乏。難於牧放。不若將馬價收回。臨時以下乘充數。較為易辦。彼此兩便。以致市僧姦販三五成羣。隨營朋夥設法購買紅單。牟利分肥。弊端百出。上年盛京途次。特令步軍統領衙門盤獲兩案。當令查明嚴辦。此次木蘭行圍。復經查明買單賣單者若干。犯可見積弊已久。羣相習慣。幾不知私賣紅單為違例犯法之事。即上年審辦之案。該官兵等竟尚有憤然不知自蹈禁網者。今此案經特派大臣詳訊定擬。復



敕令軍機大臣會同行在刑部。逐加覈議。降旨通行。自是之後。犯者即照此科罪。不能稍從寬貸。著應領官馬官兵之該管文武各大員。傳到官兵人等。將此旨詳晰宣示。務使家喻戶曉。共知儆畏。庶不致以身試法。現已諭令兵部堂官。將官給領馬紅單數目。及一切收放事宜。悉心籌議。章程具奏。自明年為始。官兵等領馬一事。均須循照新定章程辦理。其放馬收馬。仍按舊制。總須實放實收。不得再有通融致滋弊竇。○又

諭。私買紅單一事。由來已久。蓋因買者賣者及察哈爾

交收馬匹之人。均有便利可圖。彼此出於情願。雖明知犯法而不顧。然其弊不可勝言。隨扈官兵。給予紅單。領馬乘騎。原以其差使繁重。俾資其馳驅之用。係屬我朝舊制。該官兵等。即或自揣不需馬匹。亦不應將紅單私自賣給他人。乃希圖得有價銀。沿途又省餽養之費。迨差竣交馬時。率以疲瘦不堪者充數。交收。否即折交銀兩。亦有折交錢者。實不成事。而察哈爾官兵等。因所交之馬。多有疲瘦。即交回亦難牧放。莫若將銀折收。易於買補。是以亦所樂從。殊不知此項紅單。一入馬販之手。伊等因緣為姦。即可遴揀好

馬冒領售賣以遂其牟利之私試思察哈爾每歲應調馬匹不下萬數當點收時即未必能一一足數且駕下居多其較為良駿者官員等無由領得轉為販夫購取迨至交馬時不特盡成羸乏且又任令折交短缺更多以致官馬日少良馬盡歸馬販若不徹底查辦則每遇巡幸一次官馬即轉賣與民間多匹是則於馬政殊有關係此等弊端即在收放之王大臣等未必不知特以積久相沿不肯任怨俱思討好令人感激因循疲玩總不查辦即如上年盛京途次掣獲包攬換馬紅單之吳二等各犯經軍機大臣會同

行在刑部澈底審究。嚴行科罪。乃甫經懲創。本年又有拏獲之案。可見官兵人等。竟若視為故常。無所畏懼。實為惡習。今積弊既經查出。不可不嚴定章程。力加整頓。著兵部堂官悉心體察。酌覈事理。將隨團官兵應領馬匹。或按其差使酌減數目。其領馬時如何不致冒領。設有私賣紅單及折交銀兩者。應如何定以罪名。察哈爾官兵有私收銀兩者。亦應一體科罪。私買之馬販等。更當從嚴問擬。其派出驗收驗放之大臣等。應如何確切稽查。如有知而不舉。如何分別懲處之處。妥議章程。奏請定奪。此係多年鉅弊。恐非

旦夕所能革除。著自明年為始。官兵領馬交馬。總須按照馬匹實數。如交回之馬。實有過形疲瘦。難以牧放者。准令察哈爾都統奏明變價。另行買補。不得再有通融滋弊。欽此遵

旨議准。給發紅單。惟以各該處送部冊籍為憑。若於啟鑒前數日始行造送。則辦理草率。每易滋弊。嗣後令各該處於半月之前。將官兵姓名。及應領馬數。即行造具漢字文冊。詳悉登註。咨送兵部。兵部督率承辦司員。按名覈對。給發紅單。將該官兵姓名註明單內。以為實放實收確據。如該處

冊內不將領馬官兵姓名及馬匹數目。逐一分析詳註。致有遺漏。或並不按照半月以前之限。遲至三五日前始行咨送到部者。兵部即行查叅議處。再放馬紅單。向由各處該管章京領去散給官兵領騎。嗣後即令該處承辦官員嚴切稽查。如有私賣紅單及折交銀兩。並察哈爾官兵折收銀兩者。一體科罪。私買之馬販等。交刑部從嚴問擬。其散給紅單之該管官。一併議處。仍令派出驗收驗放之王大臣等實力稽查。如有前項情弊。知而不舉者。交部議處。仍行文步

軍統領衙門屆時多派番役嚴密查拏不使馬  
販因緣為姦致干禁網○又奉

旨○兵部議奏放給派出隨圍官兵人等馬匹數目各處  
減額及議定放過回交各例之處業經照議准行矣  
此二年兵丁領馬紅單查出有任意私賣者已將該  
兵丁等均行治罪詳究其故此數年察哈爾解送馬  
匹瘦劣者多該兵丁等不堪乘騎始將馬票賣去所  
領馬匹瘦劣該兵丁沿途受累儻有倒斃殘廢回圍  
時回交必致賠累今該處應領馬匹數目又減一千  
餘匹嗣後察哈爾解送馬匹更易於辦理況前此加

恩察哈爾官員等。將收領回園回交馬匹時。准以倒斃五釐報銷。該官員理合感恩奮勉辦理。其張家口離京及熱河均隔數百里。若於彼處即將瘦劣馬匹解來。及至到此。必愈疲瘦。不堪乘騎。今派出隨園官兵等。應領馬匹。均照新例收領。如有將紅單折銀者。定行治罪。著交恩察哈爾都統。嗣後放給派出隨園官兵等馬匹。解京及熱河者。務擇臆肥馴良者。派妥員護送前來。若臆不及三分者。不准充數解送。再每年派出副都統等。前往察哈爾。管理牧廠馬匹。原為廠馬臆肥。若所牧馬匹瘦劣。該副都統等。即一面駁回。



另行更換一面據實具奏。儘不隨時具奏。解到時令派出放馬王大臣等留心嚴行查驗。若馬內有瘦劣者。即行據實參奏。將管牧廠之副都統察哈爾都統等一併治罪。斷不寬宥。其放馬之王大臣等。若徇情塞責。一經查出。將該王大臣等一併治罪。○十二年奏准圈馬點驗。各按旗分分別鑄造印烙。一一印記。詳造毛片口歲清冊。一分咨送兵部。以備出青點驗。一分存儲圈內。副都統間月輪往點驗一次。查旗御史間兩月輪往點驗一次。都統於每季孟月點驗一次。其月不拘時日前往。並

都統副都統查旗御史新到任者各點驗一次。遇出青放馬收馬之時。公同到圈點驗。如查有空頭捏混弊端。將管圈官員參辦。並上屆點驗不實之員。一併參處。如有逾期不往點驗。許互相參處。○又

諭董誥等奏覆議馬政章程一摺。將裁減馬匹清單進呈國家定制。凡遇講武行圍及一切時巡典禮。所有扈從之官員兵丁人等。各給官馬乘騎。自一匹二匹。以至四五匹不等。按其差使之繁簡。以定馬數之多寡。啟程之時。皆應實領馬匹。迨回京之後。仍應將原

馬交官。即聞有在途倒斃情事。亦均令呈驗馬尾馬耳。始准折交馬價。從前立法之時。制度本極詳盡。乃日久弊生。官兵等平日拴養空頭。當交馬之時。多以銀錢折交。而隨圍領馬之官兵。圖得銀錢。不復照數領馬。迨回圍之日。仍以銀錢折還。即察哈爾官兵。亦有折收馬價之事。該官兵等領馬多者。不過將一二匹自行乘騎。其餘紅單。概行售賣。即領馬少者。亦往往另覓乘騎。仍將紅單賣去。藉貼補差使。為詞。任意花銷。積習成風。通同弊混。竟已視若泛常。不復知為違條犯法之事。前年盛京途次。曾經盤獲破案。上年

木蘭行圍。又經續行拏獲多犯。均經嚴行懲辦。實屬情真罪當。毫無屈抑。官兵等必自人人共知儆戒。但思積弊已久。並不知始自何年。該官兵等平日慣見習聞。竟若凡遇隨圍例。應如是。因而相率效尤。並非敢於作僞。若專將此兩案之人。從嚴辦理。尚未得其平。且即上兩次辦理此事。其同時漏網之人。正復不少。該犯等均經分別遣戍。問擬徒流枷杖等罪。亦足示懲。著加恩。即將十年十一年盛京熱河兩次私賣紅單之官員兵丁及私買之人。並同案各犯。俱從寬釋回。所有案內官員兵丁。統交刑部查明。另行開單。

具奏。候朕酌量施恩。至此番另定章程。後以嘉慶十二年秋季為始。若再犯王章。決不輕恕。定行加重治罪。官兵等所領馬匹。此時既已分別裁減。更無多餘。紅單可以售賣。隨園日用之費。不得不曲為計及。著自本年秋圍為始。按照各該官兵等原領馬數。凡大圍減馬一匹。加恩給銀四兩。小圍減馬一匹。給銀三兩。即於現在節省馬乾銀內隨時動支。如此優加賞給。官兵等起身之時。盤費寬裕。而回圍之日。又無庸設措交官。較之從前干犯國法。私賣紅單。即或微幸得免。迨於回京之後。仍須竭蹶措繳者。孰為利益。伊

等俱有天良。當如何感激恩施。恪遵法度。將所得馬匹。實領實交。永除弊混。若再以身試法。致罹憲網。尚得謂之有人心乎。至從前散圈馬匹。官兵等平日拴養空頭。以致一時不能交出。前已特降恩旨。免其治罪。追繳馬乾。僅於俸餉內按每匹扣銀七兩。交察哈爾買馬足數。因思官兵等俸餉。均關係養贍之需。若坐扣太多。猶恐生計不給。而察哈爾產馬之區。其馬價本錢。每匹計不過三四兩。若給予七兩價銀。未免多至一倍。所有此項官兵。應扣銀兩。著加恩每馬一匹。坐扣俸銀五兩。寬免二兩。如此則官兵扣項較少。

生理不致竭蹶而察哈爾官兵承領買馬已可需潤亦不致有苦累情事更為妥協。○又奏定營驛各官需用馬匹不詳請總督巡撫提督總兵咨呈兵部。私差人來京買馬者罰俸一年。○又奏定屯丁兵丁違禁販馬不嚴行察出者將衛千總營千總把總各罰俸一年。衛守備守禦所千總營都司守備各罰俸九月。遊擊參將副將等官罰俸六月。將軍提督總兵各罰俸三月。總督巡撫交吏部議處。○又奏定牧廠馬匹除口老殘傷應行變價者撥出官賣外。如有將在廠牧放之

馬偷賣與貿易人等。一經查出。或被首告。將偷賣之人。係官革職。係兵丁杖一百革退。將私買之人。送部從重治罪。馬匹交入原廠。仍於賣馬人名下。追出馬價一半入官。一半賞給首告之人。其失察之該管官。罰俸六月。兼轄統轄官。罰俸三月。○同治二年奏准。古北口盤獲私馬。如在三十匹以上者。即由該副都統奏明。著交何處。即行派員解京。送交該處驗收。如不及三十匹者。即交本營賞給兵丁等乘騎。○四年覆准。洋行遣內地人持洋行字據採買驕馬。除將私



販馬匹。照例賞給原募兵丁外。人犯送交刑部  
照例訊辦。